

DEUTERONÔMIO

Hawě unāmati hātxaki

Israelī enabu itxapabu Egito anua tashnibirani bu inū Mati Sinai anushū Deusū hatu uīmani unābumawē taeshū Moisi hatu unāmahairakī hatu yusi kubainikiaki, henetima wakinā. Deusū yunuti inū hawē nemati Moisi ana hatu yusi kubaikī Moisés anibui ma mawa kemashū Josué hau hatū shanē ibu ikūkaishanū hatu katushunikiaki. Hawē yusiti hātxa Moisi hatu ana kenemakubainima Moisés mawaimakē hakiri kenerianibukiaki.

Senhor Deusū yunuima hau txibākī akubaishanūbū Moisi hakiri hatu hātxa yusinikiaki, na hātxarā

1 ¹ Mae betsa Sufe besuuri Hene Jordão ukeri bari huaikiri mae betsa betsapa Parā inū, Tofel inū, Labā inū, Hazerote inū, Di-Zaabe namakis tsua hanu hiweabumanu hawē kena Arabā anushū hatū tari hiwe pūtebaunabu anushū Israelī enabu dasibibū nikaibū eska hātxa Moisi hatu yuinikiaki. ² Mati Horebe hawē kena betsa Mati Sinai anua bui Seir baiwē 11 dia kai mati tibi dūkeatābaini mae betsa Cades-Barnéia anu hikinibukiaki. ³⁻⁴ Hene Jordão kesha betsaurishū Moisi hatu yunua Amorreu nawabu shanē ibuhaira Seom, mae Hesbom anu hiwea hawē detenamenikabube Israelī enabu hatu maemashinabu Moisi ana hatu yunua mai pakea kesuakea Edrei anu Basā nawabu shanē ibuhaira Ogue Astarote anu hiweshū hatu yunuaya Israelī enabū Ogue inū hawē detenamenikabu hatu maemakī keyushinabu Egito anua tashnibirani bu ma 40 ano kaya 11 ushetiā shaba ha dukū taeaya ha nawabu hatu yamawashinabu habiatiāri Moisi haska dasibi Senhor Deusū yunuima hau txibākī akubaishanūbū Moisi hakiri hatu hātxa yusinikiaki. ⁵ Hene Jordão kesha betsauria hariria bari huaikirishū Moabe nawabu mae ewapa pāpawā anushū yusiti hātxa Moisi hatu yusi taewakī yuikī:

⁶ “Mati Horebe anushū nukū mekenika Senhor Deusū nuku yuikī: ‘Maturā, na mati dapi mā hanus hiwei txaipaki. ⁷ Natiā nenua benibaikatsi matū mabu pewatā bukāwē, ha Amorreu nawabu hanu hiwebaunabu inū

hatu dapi dasibi hiwebaunabu mati matipa anurã. Haska inũ buirã, Arabá anu mapãpa inũ kepãpa inũ, mai tsusĩ Neguebe anu inũ, ianẽwã kesha kepãpa Canaã nawabũ mae anu inũ, Líbano anu inũ, ana nortekiri txaihaira hene ewapa Eufrates anuri ha mai dasibi anu hari bukãwẽ. ⁸Ha mai hirabi dasibi Abraão inũ, Isaque inũ, Jacó inũ, matunabu pakubaĩshanaiburi matũ shenipabu ea Senhor Deusũ inãkatsi ẽ hatu yubani anu bukĩ hanu hiweabu mebĩkĩ putakĩ hatu yamawatã ha mai hirabi ibuwakubaĩshãkãwẽ, akĩ Senhor Deusũ nuku yuini ẽ matu shinãmaiĩ”, akĩ Moisi hatu yuinikiaki.

**Israelĩ enabũ hau Deus nĩkatã txibãkubainũbũ
Moisi hatu yusinikiaki, na hãtxarã**

4 ¹Txipu Moisi hatu ana yuikĩ:
—Matũ shenipabũ mekenika Senhor Deusũ mai pepa matu ibuwamashanai anu hari hikikĩ ibuwatã mã hanu hiweshũ txibãkĩ hawẽ yunuti inũ hawẽ nemati yusini natiã ẽ matu ana yusiaĩ nĩkatã hakimama aki hawẽ hiwekubaĩshãkãwẽ, txĩtuãmarã. ²Haska ẽ matu yusianã, ana betsa wakĩ txixikĩ ewa wama inũ hãtxa betsa tere akama haska matũ mekenika Senhor Deusũ yunua besti txibai pehairashũkubaĩshãkãwẽ. ³Baal-Peor mae anushũ ẽ hãtxa nĩkama matunabu betsa betsapabũ hatũ kẽwãti dami mishkiki dãti iki beti ishũ kẽwaĩmabuwẽ taeshũ Senhor Deusũ hatu kupikĩ tenãkĩ keyuai matu dasibibũ haska mã uĩmaki. ⁴Hakia matũ mekenika Senhor Deus dasibibũ hawẽ hãtxa mã txibaĩburã, natiã mã hiweyuabuki. ⁵Haskakẽ matunã, uĩrakãwẽ. Hanu mã hiweshanai anushũ hawẽ hãtxa mã txibãkubaĩshanũbũ Senhor Deusũ hãtxa kushipa inũ hawẽ yunuti inũ hawẽ nemati hãtxa ea yuikubirana ẽ matu yusĩriakubiranimaki. ⁶Haskawẽ taeshũ Senhor Deusũ hãtxa nĩkakĩ mã akubainaiibu tsuabũra matu uĩkĩ mã unanepabu inũ mã nĩkanikabu matu uĩkĩ shinãshãkanikiki. Senhor Deusũ hãtxa mã txibãmiskiri tsuabũra nĩkakĩ yuikubaikĩ: “Ha yurabu itxapabu patapama yusi nĩkanikabu inũ unanepabuki”, akĩ matukiri yuitirubuki. ⁷Hakia nawabũ hatũ kẽwãti yushibu itxapa hayabũ kẽwãkĩ yukabiabu hawa hatu nĩkatã kematirumaki. Hakia nukuburã, nukũ mekenika Senhor Deus nũ haya hawẽtsais nũ yukai tibi nuku nĩkatã kemakubainikiki. ⁸Na yunuti hãtxa inũ hawẽ nemati hãtxa pepa natiã ẽ matu inãshu keska, haratu yurabu hatũ beya pepa hayabumẽ? Haska hayabumaki. ⁹Hakia 40 ano dasibi mã uĩkubirãshina mã hakimataskayamashanũbũ uĩrahairakubaĩshãkãwẽ, shinã heneamarã. Haska mã uĩkubiranai shinaĩ hiwekubaikĩ na habias hãtxa inũ hawara mã uĩkubiranai matũ bakebu inũ matũ bababu shabakabi hatu yusikĩ tapĩmakubaĩshãkãwẽ— iwanã,

Mati Horebe anushũ Deus hãtxani Moisi ana hatu shinãmanikiaki, na hãtxarã

¹⁰hatu ana yuikĩ:

“Haria nũ huima anu Mati Horebe dapi Senhor Deus bebũ matũ ibubube mã mapubaunibu ẽ shinaĩ. Harishũ Senhor Deusũ ea yuikĩ:

‘Israelí enabu ea bebū ea hatu itxawashūwē, ē hātxa ē hatu yusiaĩ nīkakī tapītā hau shaba tibi eki mesekī ea kēwāriakubaīshanūbunā. Habiaskari wakī hatū bakebu hatu yusīkī hau hatu tapīmariapakeshanūbunā’, ea wa ¹¹ ē matu itxawakē mati tenāmā matū ibubube mā bea mapuabū mati anu txi here hi hi ikaunaya txi kuī nai anu inakaĩ meshu dunukē ¹² hanua Senhor Deus txi here namakis anua hātxyaya hawē hui nīkakī hawa dami mā uīāma inibuki. ¹³ Habiatiāri hawē yubati hātxa matū ibubu yuitā txīpu mati anushū hawē 10 yunuti inū hawē nemati hātxa mestenepa mesehaira mishki sapa dabeki Senhor Deusū kenea hau unākī mā tapītā akubaīshanūbū matu yununiki. ¹⁴ Hanu mai pakea betsa hatu mebīkī ibuwatā harishū hawē hātxa txibaĩ mā ikubaīshanūbū hawē yunuti inū hawē nemati hātxa ea matu yusīmakubaīkatsi bebūkiri Senhor Deusū ea yununiki”, iwanā,

**Yura betsabū dami betsa betsapa kēwāmisbu keska wakī hau
Israelí enabū kēwāyamashanūbū hatu nemanikiaki, na hātcharā**

¹⁵⁻¹⁸ Moisi ana hatu yuikī:

“Mati Horebe anua txi here namakis Senhor Deus nishū matū ibubuya matu hātxa wai hawē hui besti mā nīkaniki, hawa dami yushī keska uīāmarā. Haskawē taeshū haki meseti wakī matunā, hawa dami betsa wataskayamashākāwē. Uīrahairakubaīshākāwē. Dami wakī huni itsa inū, aību itsa wakī inū, yuinaka itsa inū, peiyabu itsa inū, nutawē mapumisbu itsa inū, baka itsa wakī haska taska dami wai txakabuyamashākāwē. ¹⁹ Ha dikabi naiuri uīkī bari inū ushe inū bishi inū bishi kauani txashakainai betxitā haki mesei ‘Habaa!’ iki datekī haska kēwāyamakubaīshākāwē. Yurabu dasibi merabewakī hawara sharabu nai anua uītirubu Senhor Deusū hatu damiwashuniki. ²⁰ Senhor Deusū Egito anua matu mebikinākīrākī matu pashawakinā, hawena wabirākī matu iweniki. Na habiatiā mā hawenabuki. ²¹ Nū hawenabu kayabibia matuwē taeshū ē kaneaya Senhor Deus eki sinatakī ea yuikī: ‘Hene Jordão mī puketiruma inū mai pepa ē hatu ibuwamashanai anu mī hikitirumaki’, ea waniwē taea ²² na habia mae anua bestikiaki ē mawashanai, Hene Jordão pukebainamarā. Hakia matubunā, pukebaĩ ha mai pepahaira mā ibuwashanai. ²³⁻²⁴ Hakia matū mekenika Senhor Deus yaushinikatū txiwē dasibi kuamis keska matuki sinataturuwē taeshū haska matū mekenika Senhor Deusū matu yubani hawē hātxa hakimama inū habiaskari dami betsa betsapa ha dami watima matu nemani habu tibi hakimama uīrakubaīshākāwē.

²⁵ Mai pepa anu hikinishū bake pawai inū baba pawai ha mai anua anibui hakimakubaīkī ha kēwāti dami betsa betsapa shinākī mā ashanimēkaĩ. Haska wakī matū mekenika Senhor Deus bebūshū txakabu tibi wakubaīkī mā sinatamatirubuki. ²⁶ Eskawē shināti shabakabi ē matu

waii. Nai inũ mai habu txanitirubu keska wakĩ ẽ matu unãti wamaii. Na ẽ matu hãtxa wai danãkĩ mã txakabuwakĩ Senhor Deus sinatamai hauri mã kashanai anua mã debui keyushanaii. Hari mã hiwei txaipama itiruki, yamai keyuirã. ²⁷Mã txakabuwai matu kupikĩ nawa betsa betsapana anu sa akĩ Senhor Deusũ matu ubisitawashanikiki. Matu haska wa hatiri eskarabes hatũ mae anu mã hiwebaũshãkanaii. ²⁸Nawa betsa betsapabu anushũ harishũ yushĩ hunibũ hatũ mekenẽ dami wakĩ hi inũ mishki dami wamisbu ha damirã, uĩtirubuma inũ, nĩkatirubuma, inũ pitirubuma inũ, huĩsinatirubumabiakẽ nawabũ beya txibãkĩ mã hatubetã kẽwãshanaii. ²⁹Harishũ atimas yushĩ dami danãkĩ matũ mekenika Senhor Deus hakimatã danãbianishũ ana benakĩ matũ yushĩ hirabiwẽ inũ matũ huĩti hirabiwẽ shinaĩ mã ana haki nukutiruki. ³⁰Mã nuitapai inũ mã bika teneai uĩkĩ atimas shinã betsa watã ana txitũkirã haska Senhor Deusũ matũ ibubu yusini mã ana nĩkakĩ akubaĩtiruki. ³¹Dateyamakãwẽ. Matũ mekenika Senhor Deus nuikipahairatũ matu putama inũ matu yamawama ishanikiki. Haska matũ shenipabu yubanishũ hakimama matu ana mekekĩ heneama ikũkaĩshanikiki.

³²Shinãkãwẽ. Unu hiwei taenibutiã inũ hari mã hiwei taenitiã ikubirãshinaburã, Senhor Deusũ mai hirabi dami wakĩ huni wani anua mai nati ikĩ tsuabura mã hatu yukatiruki. Na haska ẽ matu yuiã keska nukũ Senhor Deusũ kushipa keska betsabũ unanibumẽkaĩ. Uĩriakanimẽkainã, na haska nũ uĩshina keskarã. ³³Txi here pueai meranua Deus hãtxai nawa shukua betsã nĩkatã debuama inibu hayamẽ, haska mã nĩkani keskarã, txi meranua hãtxairã? ³⁴Haska matũ mekenika Senhor Deusũ matũ ibubu katushũ abirani keska nawa betsaburã, tsua haska keska hayabumẽ? Eska tibi akinã, matũ ibubu katushũ hawẽ unãti itxapa inũ, hawẽ unãmati dami itxapa inũ, dami itimaska betsa betsapana wakĩ hawẽ kushipawẽ hatu datemakĩ hatu detenamemakĩ Egito anua Senhor Deusũ matunabu abirani keska habias mã uini keska wakĩ mekenika yushĩ betsanã, atirumẽ? Haska keska hayamahairaki. ³⁵Matũ mekenika yushĩ pepa txanima kayabi Senhor Deuski. Tsuã Deus binua ha keska betsa hayama matu unãmaniki, haska matu shinãmakinã. ³⁶Nai anushũ hawẽ huiwẽ matu hãtxa wakĩ mã kaneaibu matu pewakubiraniki. Hanua mai anushũri hawẽ kushipa txi here meranua Senhor Deusũ hãtxa tashniai mã nĩkakubiraniki. ³⁷Matũ shenipabu betxipai hatuwẽ nuikũkiraniewẽ taeshũ matunaburi pakubainaibu katutã hawẽ kushipa mẽtsisipahairawẽ mebinanãkĩ Egito anua Senhor Deusũ matu tashnimabiraniki. ³⁸Hanua mai pepa hatu mebĩmakĩ matũ berubi nawa shukua tibi matu nitxĩshũkĩ habu mirima matu binuã kushipahairabiabũ hatũ mae betsa betsapana anua Senhor Deusũ matu hatu putashũkubirãkĩ dama keyuikiki. Matu haska washunaya hatũ maiwã inũ hatũ mae tibi mã mebĩkubaĩshanaii, ibuwakinã, natiã matu ashuaĩ mã uiaĩ keskarã.

³⁹Haskawē taeshū matū shināwē tsuma pewatā hakimayamakāwē, mistu pewakinā. Matū mekenika Senhor Deusrā, nai inū mai hirabi hawenaski. Mekenika ha keska Yushī Pepa betsā binuā tsua hayamahairaki. ⁴⁰Haska natiā ē matu yunuai keska hawē yunuti inū hawē nemati hātxa Senhor Deusū matu yunuima akī txibākubaishākāwē. Mā haska waibū maiwā ibuwamakī Senhor Deusū matu inaī anu matu inū matunabu pakubaini bari itxapa hanus hiwepakeshākanikiki”, hatu wanikiaki.

**Nukū mekenika Senhor Deus betxipaikī nukū
yura hirabiwē atikiaki, na hātstarā**

6 ⁴Txipu Moisi ana hatu yusikubaikī yuikī:
“Israelī enabuū, matu yuinū ea nīkakāwē. Nukū mekenika Senhor Deusrā, bestitxaiki, hatū kēwāti dami betsa betsapa keskamarā.

⁵Haskakē matū mekenika Senhor Deus betxipaikī matū huīti dasibiwē inū matū hiwea dasibiwē inū matū kushipa dasibiwē duawakubaishākāwē, heneamarā.

⁶Na haska dasibi ē matu yuishu matū shinā merā netātā hakimayamakubaikāwē. ⁷Ha dikabi na haska tibi ē matu yusīshu haska tibi hakiri hātchakī matū bakebu yusikubaishākāwē, matū hiwetāshū inū, bai namakishū inū, ushaitiā inū, mā besteaitianā. ⁸Na yunuti hātxa keneshū hakimatomakī bitxi bau pishta watā neshatā matū mepitiki inū matū betūkuki neshetā haya mapukubaishākāwē. ⁹Ha dikabi matū hiwe beputi istabī dabeki habias na yunuti hātcha kenekubaishākāwē. Ha inū, matū mae kenekauana hanu hikimisbu shui beputi anu habiaskari wakī keneriakubaishākāwē”, itā,

**Senhor Deus nīka pewatā hau haki besti txiti ishanūbū Israelī
enabu Moisi hatu nemakī yusitxakayamanikiaki, na hātstarā**

¹⁰“Matū mekenika Senhor Deusū matū shenipabu Abraão inū Isaque inū Jacó mai pakea yubani anu ma matu hikimai kaikiki. Mae ewapa hawērua sharabu anu dayakī mā beniama ini nawabū ayamabu anu Senhor Deusū matu ma ibuwamai kaikiki. ¹¹Hiwe pepa mabu mata haya hawa mā hanu aruama inibu inū, ūpash banakī mā pukiāma iriani inū, uva bai washū mā banama iriani inū, mibā hi oliva itxapa mā banama iriani mā ibuwashanaii, ha mae anushū bimi pikī yaniwai pepeirā. ¹²Egito anushū matū ibubu dayaru escravo wanishū hatu itxakawaihu hawē kushipawē Senhor Deusū hatu mebikinātā iwekubiranishū mai pepa anu ma matu hikimarā, haska tibi bestikiri shinākī nukū mekenikaki petxitā hakimayamakubaishākāwē. ¹³Haska shinaī Senhor Deuski mesekī kēwāī ha besti dayashuni peshūkubaishākāwē. Tsuabura mā yubakakatsis ikairā: ‘Ē mia parāmaki’, iwanā, Senhor Deusū kena bestiwē shabakabi yubakakubaishākāwē. ¹⁴⁻¹⁵Matū mekenika Senhor Deus matube hiwearā, yaushināki, hawa txakabu husia uīkatsi ikama pepa besti matu uinū ikarā. Hakia mā kanekubainaya

hawaira matuki sinatakī Senhor Deusū matu yamawatiruki. Haskawē taeshū matu dapi hiwebaūshanaiburā, habū yushibubu tibi kēwāmisbu hayaki. Hatu txibākī hatubetā kēwāyamashākāwē”, hatu anikiaki.

**Hene puketā mae bestitxai anushū Senhor Deus
kēwāshanaibukiri hatu yuinibukiaki, na hātcharā**

12 ¹Israelī enabu Moisi ana hatu yuikī:
—Nukū shenipabū mekenika Senhor Deusū ha mai pakea yunukī matu ibuwamashanai anu hikitā na hātcha ē matu yusiā harishū Senhor Deusū yunuti inū hawē nemati hātcha matū hiwea hirabiwē mā txibākī akubaishanūbū ē matu yuiāi ea nīkakāwē. ²Hene kesha betsaursishū yura betsa betsapa shukua tibibū mae hatu mebī mā hatube detenamekubaishanai. Hanushū hatū yushibubu kēwāmisbu yamawakī keyukubaishākāwē, mati keyatapa anu inū mati tenāmā anu inū hi tupā namāshū habū hanushū kēwāmisburā. ³Hanushū hawē kēwāti txi tapu tekekī keyukī inū, hawē kēwāti mishki nitxinibu durukī keyukī inū, txibu nitxinibu hanushū kēwāmisbu kua keyukī inū, hatū yushibubu dami wanishū kēwāmisbu yamawakī keyushākāwē. Ha dami uikī hatū yushibu shināmisbu dasibi tere akī keyukubaishākāwē, ha hatū yushibu dami hau tsuā ana shināyamashanūbunā.

⁴“Haska hatū yushibubu kēwāmisbu keska txibākī nukū mekenika Senhor Deus ha ita watā kēwāyamashākāwē. ⁵Hene kesha betsaursi matunabu shukuabu tibitū mai pakea ibuwaimabū haratura mae Senhor Deusū ha mae katua hanu haki nukuti tari hiwe hawē kena hanua kaiā anu kashū kēwākī matū mekenika benimawakī mā kēwākubaītirubuki. ⁶Ha Senhor Deus benimawati inabu menukī keyuti inū, dízimo ināti inū, hamapai merabenāti inū, haki tanai bebūkiri mī yubakaima inākuīti inū, matū shinanē besti inākuīti inū, habu dukū ina awa bake bene inū txashuwā kaiāibu ha hiwe anu hari dasibi hatu inākī bupakeshākāwē. ⁷Haska mā daya txakayamakubainai yunu matu ināshina shinākī Senhor Deus bebūshū itxashū matunabubetā besti pi benimakī uīmakubaishākāwē, Senhor Deusū matu duawakubaishinawē taeshunā.

⁸Natiā haska nuku tibitū shinākī haska nū betxipaiāi nū akubainaibu keska ukeri puketā na mā ikai keskayamashākāwē. ⁹Txanimahaira ha mae anu mā unanuma hiwekubaishanai anu Senhor Deusū matu ināshanai anu mā hikiriamaki. ¹⁰Hakia Hene Jordāo ma puketā hanu Senhor Deusū matu ibuwashuni anu hikitushitā hanua matuki sinataibu Senhor Deusū hatu matu nemashunaya hawama dateama mā unanuma hiwekubaishanai”, hatu watā

Senhor Deusū hātcha ikūwākī henetimakiaki, na hātcharā

³²hanushū Moisi ana hatu yuikī:

“Haska ē matu yusikī yunukubiranai akubaikī henetaskayamashākāwē, hātcha betsa tere akama inū hātcha betsa txitxikī betsa wamarā.

13 ¹Matunabu anua haska iriamabia bebūkiri unātã matuki txanitirubu inũ namakĩ uītã matu yuitirubu tashnitã ²haska iriamabia bebūkiri matu yuishina ikaya ana matu yuikĩ: ‘Yushibubu mã unãriamabia ha txibãkĩ itxashũ duawakĩ kēwanãkãwē’, akĩ matu yuibiabu ³nĩkakĩ ikũwãyamakubaĩshãkãwē. Hakia matũ hiwea dasibiwē inũ matũ shinã dasibiwē mã Senhor Deus betxipaiai matu unãkatsis ishanikiki. Haskaya ha huni nematã txibãyamashãkãwē. ⁴Hakia matũ mekenika Senhor Deus besti txibãkĩ kēwaĩ haki dasia hiweshũ hawē hui nĩkakĩ hawē yunuti inũ hawē nemati akubaĩkĩ dayashũkĩ duawakubaĩshãkãwē, yusinã betsa betsapabu nĩkamarã. ⁵Egito anu matũ ibubu itxakawakĩ hatu dayaru escravo wakubainaibũ hanua matũ mekenika Senhor Deusũ hawē kushipawē matũ ibubu pashawani hakimayamakubaĩshãkãwē. Na hunibũ hatũ yushĩ betsa matu txibãmakatsi ikĩ Senhor Deus matu danãmakĩ hawē hãtxa matu nĩkamamakĩ Senhor Deusũ hãtxa txibaĩ mã hawē pei hiwebiakē ha hunibũ haska iriamabia matu yuitirubu inũ namawē uītã matu unãmatirubu hatu detekĩ tenãshãkãwē. Haska wakĩ txakabu matu anua mã beshtetirubuki”, hatu watã

Ikũwãbumã beya hau ayamashanũbũ hatu yusinikiaki, na hãtxarã

18 ⁹Moisĩ ana hatu yuikĩ: “Ukeri maiwã pakea matũ mekenika Senhor Deusũ matu ibu wamashanai anu ibuwai hikitanã, nawa betsa betsapabũ habũ hamapai beya atimapa txakabuhaira hayabuki. Hatu uītã hatu mawayamashãkãwē. ¹⁰⁻¹¹Habunã, yushibu txakabubu daewakatsi ikĩ hatũ bake mishtĩbu inãkĩ menu keyushũmisbu inũ, yushibu hatu yukashunikabu inũ, huni mukaya mesebu inũ, nai anu bishi dua unanikabu inũ, yushĩbe hãtxanikabu inũ, yushĩwē shũ itiabu inũ, yurabu mawabube hãtxanikabu matu dapi hiwebaũshãkanikiki. Haska tibi hatuna tapĩkĩ mawayamashãkãwē. ¹²Tsuabũra haska waibu danãkĩ Senhor Deusũ betxipaitirumahairaki. Haska nawabũ beya txakabuhaira hayabuwē taeshũ matu bebushũkaikĩ matũ mekenika Senhor Deusũ hawē kushipawē matu hatu nitxĩshũkubaĩshanikiki. ¹³Senhor Deusũ matu uiãyã hawē hãtxa hawa kaneama pepakubaĩshãkãwē. ¹⁴Nawa betsa betsapa mã hatu nitxĩshanaibũ harishũ hatũ mukayabũ haska inũbariai hatu yusiaĩbu ikũwãmisbuki. Hawara tashnishanai bebūkiri yuimisbu hayaburiki. Hamē maturã, matũ mekenika Senhor Deusũ habũ amisbu keska matu nemamismwē taea hatu txibaĩ haskayamakubaĩshãkãwē.

Deusũ hãtxa yuishunika betsa tashnishanikiaki, na hãtxarã

¹⁵Matũ mekenika Senhor Deusũ hawē hãtxa yuishunika betsa ea keska katutã matunabu anua matu tashnimashũshanikiki. Deusũ matu haska washunaya hawē hãtxa nĩkakubaĩshãkãwē. ¹⁶Mati Horebe anu itxashũ Senhor Deusũ hui kushipa ana nĩkakatsi ikama ea yukai eska hãtxai:

‘Senhor Deusū hui nū ana nīkakatsi ikamaki. Hawē txi here kushipa tuenai nū ana uīkatsi ikamariki, mawakatsi ikamarā’, akī haska matū ibubū ea yukanibuki. ¹⁷Hatū hātxa Senhor Deusū nīkatā ea yuikī: ‘Haska shinākī yuiaiburā, peki. ¹⁸Hatu anua ē hātxa ea yuishunika mia keskari katushū ē tashnimashanai. Kushipa wakī haska ē yunua hatū ea habu yuishūkubaīshanikiki. ¹⁹Hamē ē kenawē hāt_xakī ea hatu yuishunai tsuabūra hawē hāt_xa nīkama ikubainaibu eanā, ē hatu kupishanai. ²⁰Hakia tsuabura ē kenawē hāt_xabiakī hawara ē ha yuiama hawē shinanē besti matu yuiaibu inū yushī betsā kenawē hāt_xakī matu yuiriabu hatu nīkama tenāshākāwē’, akī Senhor Deusū ea yuini. ²¹Haska ē matu yuiaya matū huīti merā shinākī: ‘Tsuāra Senhor Deusū hāt_xa yuiarā, haskatā nū unātirumē?’ mā itiruki. Matu yuinū ea nīkakāwē. ²² Senhor Deusū kenawē hāt_xakī matu yuibiabu haska yuiai hawa kaiāmakē Senhor Deusū hatu yunuamaki. Hakia kanekī hatu kēwāmanū ika hatū shinanē besti matu yuiaibu hatū hāt_xa nīkama hatuki dateyamakubaīshākāwē’, akī hawenabu Moisi yusinikiaki.

Tsuāra hawara uiāmabia txanitxakai nematikiaki, na hāt_xarā

19 ¹⁵Shanē ibu bebūshū yura betsaki sinatakī kūyā akī shanē ibu yuikī: “Natunā, ma txakabuwashuki”, akī bestitxaitū haska hawara hakiri txakabu yuibiaya shanē ibubū hau nīkayamanūbūwē. Hakia dabetū kasmai, dabe inū bestitū habias hāt_xawē txitekī yuiaibu nīkashū unāti watā shanē ibubū kupitirubuki.

¹⁶“Haska inū, huni betsā txakabu yura betsaki sinatakī hawa meai uiāmabia haki kayai kūyā ikaya ¹⁷ha dabe betsā haki kayanū betsā hawa meamawē taea ha irabeaya Senhor Deusū hatu nīkaya hatu iyushū hawenabu Senhor Deusbe hāt_xashunikabu inū shanē ibū hawara txakabu inū pepabu unāti wanikabu bebūshū ha dabe nitxītā Senhor Deusū hatu nīkaya ¹⁸unāti wanikabū hatu yuka txakayamakī ha haki txanitxakai ha kūyā ishu txani unātā ¹⁹⁻²¹habias kupiti yura betsaki txanitxakakī nuitapawashūwē taeshū shanē ibubū hau ha huni txakabū haska shināshu keska hawa hawē nuiamahaira hau kupikubaīshanūbūwē, hawē hiwea benumakinā, ketxaish akī sheta paskeriakinā, hawē beru tsekariakinā, hawē tae kasmai hawē mekē meshteriakinā, ha txanitxakaibu matū shanē ibū hatu kupiaibu nīkatā hawē datei hatū shinā txakabu beshtekekubaīshākanikiki. Hatu haska wakī matu anua ha txakabu mā yamawakubaīshanai”, akī Moisi hatu yusinikiaki.

Moisés mawanikiaki, na hāt_xarā

34 ¹Hawenabu yusi kī keyutā Moabe nawabū maiwā pāpa anua kai Mati Nebo anu mapekei ana mati kuburu betsā hawē kena Pisga mamaki nishū habias besusi Jericó uiā anurā, hanushū Senhor Deusū Moisés uīmakī hatishū Gileade enabu inū Dā enabū hatū mai pakebukuā

kesua ishanai uĩmakĩ ² inũ hanu Naftalĩ enabu hatũ mai pakea anu hiwebaũshanaibu inũ, hanu Efraimnẽ enabu inũ, Manassésĩ enabu hiwebaũshanaibu anu inũ, bari hikiaikiri Ianẽwã Mediterrãneo kesha kesua anu hatishũ Judá enabu hiwebaũshanaibu uĩmakĩ ³ inũ napãpa mai tsusĩ sul anu inũ, Hene Jordão kesha pãpa inũ, Jericó mae napãpa ewapa anu hanu paniwã mapubauna anu kesutani mae pishta hawẽ kena Zoar kesua uĩmakĩ keyutã ⁴ Senhor Deusũ Moisés yuikĩ:

“Ha maiwã hirabirã, mĩ shenipabu Abraão inũ Isaque inũ Jacó habu tibi yubakĩ: ‘Ha maiwã pakea matunabu pakubainaibu ã hatu ibuwamashanaii’, akĩ ha dabe inũ besti ã hatu yubaniki. Ha maiwã pakea mĩ beruwẽ mĩ uinũ ã mia uĩmaii. Hakia ukeri pukebaini mĩ katirumaki”, akaya

⁵ habiaskari Senhor Deusũ bebũkiri yuimarã, Senhor Deusũ tsuma Moisés mawakẽ ⁶ Moabe nawabũ maiwã pakea anu Bete-Peor besusi napaku anu hawẽ yura Senhor Deusũ maiwanikiaki. Mawa hanira hawẽ yura Senhor Deusũ maiwanirã, na habiatiã tsuã unãmakiaki. ⁷ 120 ano hayabia hawẽ beru inũ hawẽ yura babuama Moisés mawanikiaki.

⁸ Ma debua unãtã Moabe nawabũ maiwã pãpa anu Israelĩ enabũ Moisés manui shinaĩ kashai 30 dia kashakubaini nesenibukiaki. ⁹ Hanushũ bebũkiri Josué katukĩ hawẽ mekẽ dabewẽ Moisiĩ mamepishũ hawẽ unanepati kushipa Moisiĩ Josué yunuimawẽ taeshũ haska Senhor Deusũ Moisés yunumaima keska wakĩ Josué hãtxa Israelĩ enabũ hari nĩkakĩ taewabainibukiaki.

¹⁰ Moisés keska Deusũ hãtxa yuishunika betsa Israelĩ enabu anua tsua haska keska hayama inibukiaki, haska habe beisinaĩ hãtxapauni keskarã. ¹¹ Hatu eska washunirã, Egito anushũ hatũ shanẽ ibu Faraó inũ hawẽ shanẽ ibu beshmasbu inũ hawenabu dasibi kupikĩ hawẽ dateti unãmati dami Moisiĩ hatu ashuni inũ, ¹² haska Deusũ kushipa inũ hawẽ mesehairawati dami tsuã atiruma hatu washuaĩ Israelĩ enabu dasibibũ uĩkubainibu tsuã haska keska wakĩ Moisés binutirubumahairakiaki.